



## SWISS BISS

Uff iiri Swiss sinn Herr und Frau Schwyzer stolz,  
si gheert zwoor de Schwoobe, aaber was soll s.  
Si isch Aini vo de beschte Airlines uff dr Wält,  
drum koschtet s au e bitz mee Gäld.  
Drfir wirsch mit eme „Grüezi“ an Bord begriesst,  
kuum bisch an dim Blatz, dr Schämpis fliesst,  
s git e Bhaltis, Heftli und wyssi Dischdiechli,  
e fimp Gang Menü und zem Dessert Ööpfelkiechli.  
Denn rollsch di Bett flach, machsch Oorestebbsel ygne,  
schloof guet, s wird Nacht in dr Kabine.

Nit alles pfuust in dr Business Class,  
e bsunders Veelggli hett jetz si Spass!

Scho feen d Wanze afoo danze

und bysse de Tourischte in ire Ranze.

Si mache au vor dr Stewardess nit halt

und soo ne Biss losst niemerts kalt.

Das Fluugi wird sofort separiert,

desinfiziert und sterilisiert.

So schnäll isch mit bissige Wäntele Schluss,

Niemerts me hett dr Verdruss.

Doch bissigi Wanze hetts iiberall,  
das isch nit numme bi dr Swiss dr Fall.  
Me kaa laider nit alli paralysiere  
und iiri Biss dermit ussradiere.

Lueg zem Bysspyyl dr Wessels aa,  
wie die Wanze bysse kaa.

Iberall Baustelle, kunnsch niene aane,  
froggsch di äächt, wäär daas duet blaane,  
d Innertstadt autifrei, numme Velos erlaubt,  
das isch effiziänt, wäär das wool glaubt.

Und als wenn daas alles nit scho gnue wäär,  
hänn d Basler in dr City es bsunders schwäär.

Dr Bebbisagg, dää wo s ee scho verjaggt,  
wird ab sofort underirdisch paggt.

Dr näggsc̄t Container isch nit umme Egge,  
wo aane also dä Wanzedrägg stegge.

Mit em Mischtsagg in der Hand  
machsch e Baustelle Slalom, dasch allerhand.

Denne gitts no die schmiirige Wanze,  
die photographiere doch glatt iiire Ranze.  
Schigge das Selfie umme und finde s dr Hit,  
aso e settige Stapi mecht ych scho nit.

Dr Schawinski bysst dr Andreas Thiel,  
däm mach das Ganze gar nit viil.  
Dää hett soviil Hoorlack aanegschmiert,  
das jeedi Wanze sofort krepiert.

D Nationaalbangg die bysst gräftig zue,  
hett nämlig vo däm Euro gnue.  
D Börse gracht zämme, e Riiseverluscht,  
und s Baasler Gwäarb hett e zimlige Fruscht.  
Denn statt mit em Velo in d Innerstadt z faare,  
duesch mit em Achter no Weil usse kaare.  
Wenn mit all diine Gugge ins Drämmli kunnsch,  
hesch dehaime numme no ai Wunsch.  
Dr Abfall kunnt nämmlig in Bebbi Sagg,  
hoffsch das es in dies Mool nit verjaggt.

E Biss hett au dr Hoffmann-La Roche iiri Pharma,  
die baue e Turm, als isch das iir Karma.  
Wie die Wanze uff dr Mauer  
Gseesch vo iiberall dää Tower.  
Dä Bau s Stadtbild glaar dominiert  
und zeigt wo Macht und Gäld residiert.

Bissigi Wanze iberall und viil,  
drum lauffe mr daas Joor so als Spiil,  
Drummle, pfyffe, bysse und danze  
zämme als Runzlebierger-Wanze.